

四庫全書

經部

欽定四庫全書

經部
四書蒙引卷十一

詳校官給事中_臣戴璐

刑部郎中_臣許兆椿覆勘

總校官編修_臣倉聖脈

校對官中書_臣葉蘭

謄錄監生_臣左熙世

欽定四庫全書

四書蒙引卷十一

明 蔡清 撰

滕文公章句上

滕文公為世子

或四十四字

世子太子也

註或謂天子之子為太子諸侯之子為

世子非也周公立教世子之法成王亦稱世子則世

子太子太子諸侯之子通稱矣故曰世子太子也後

世乃分性者人所稟於天以生之理也註此所謂

天地以生物為心而所生之物因各得夫天地生物之心以為心所以人皆有不忍人之心不忍人之心即所謂仁而義禮智信皆在其中矣性之所以為善者豈有外於此哉但衆人汨於私欲而失之註汨者乍出乍入之義不全是沒也若作沒字解可不用而失之三字矣汨於私欲而失之不可兼氣稟所拘說蓋孟子此處正是論氣不論性不備者下文說堯舜亦只言堯舜則無私欲之蔽而能充其性不言

氣稟清明無物欲之蔽也

言必稱堯舜

芟二條減六十二字

言必稱堯舜者每言堯舜盡性之事以實之見人皆
可以為堯舜也 道性善與稱堯舜二句互相發者
也蓋知人性之本善則知堯舜之可為知堯舜之可
為則性之本善益可見 欲其知仁義不假外求者
以仁義皆吾性所固有也聖人可學而至者以聖人
與我一性也 仁義二字從何來從善字來也性有

仁義所以為善孟子論道理只以仁義二字該之

程子云性即理也似當云性即人心之理也下文云喜怒哀樂未發何嘗不善可見非泛泛言理者矣

天下之理原其所自無有不善即下句喜怒哀樂未發何嘗不善者也發而中節則無往不善所謂情之正也發不中節然後為不善氣用事而理為所蔽者也凡言善惡皆先善而後惡

云註然亦有不盡

然者如邪正災祥曲直牝牡雌雄臣主之類亦皆顛

倒其字皆從一時語音所便久之遂為不易之成語耳

世子自楚反復見孟子

減十二字

當戰國之時而言性善人固已不能信矣况又言堯舜可學而至其誰不駭且惑哉惟滕世子資質最善者故能領受孟子之言然終不能無疑故自楚反復至宋而見孟子蓋恐別有卑近易行之說以其前言之難充也孟子即迎而謂之曰世子疑吾言乎夫道

一而已矣固不可抗之使高亦不可貶之使卑吾安能復有異說哉當味箇一字不容二說也

夫道一而已矣

莫二條然解此義句則字舊在然字下

言道既一吾不容有二說也前言已盡矣道理也此道字泛說尤活或以道出於性性一故道一言者雖知有道德之別然解此義則泥矣不知此道字正指性也道者性命道德之總名何者不是道此處不必拘於中庸性道之分

成覲謂齊景公曰 一條 芟二條

吾何畏彼哉者以其道之一也有為者亦若是者亦
以其道之一也周公以文王為我師者亦以其道之
一也此正集註所謂既告以道無二致而復引此三
言以明之者也欲世子篤信力行以師聖賢不當復
求他說者言外意也 舜何人也予何人也意謂豈
是兩樣人哉有為者亦若是舜之所以為舜者能有
為也能有為者盡其性而已矣吾亦能盡性則是有

為矣有為則亦如舜矣若不靠性善與聖人同則何以謂之有為者亦若是哉又何以謂之吾何畏彼哉又何以謂之文王真可師哉此條以性善入說者不為非也 成颺顏淵公明儀所以如此云云者正以古今聖愚本同一性耳然則世子復何疑惟篤信力行以師聖賢而已矣

今滕絕長補短

承上文言聖賢既可學而至但恐世子自安於卑近

不能自克則終不足以望聖賢矣 此一條所以策勵世子之志使決意自克以圖恢國勢也兼有勸戒

二意

猶可以為善國

減六十五字

言猶可以自立也此於性善堯舜之說何預蓋惟其自克而不安於卑近則必擴充其仁義之心而以堯舜為法其心必正其身必脩其國必治矣此其體用一原之理又有不可易者 若安於卑近不能自克

不足以去惡而為善則其國亦不得為善國矣安於卑近本自其持身言不謂安於國勢之卑近也

書曰若藥不瞑眩厥疾不瘳

芟二條戒字舊誤作解

此言其當奮志以有為勵精而求治不可少有苟且因循之心也一或苟且因循則國事日非而終無以自存矣可不懼哉孟子此言蓋深警之也愛之至也厚之道也辭無勸戒

滕定公薨章

然友之鄒問於孟子

芟十條減九十一字移五條入下題

滕與宋近隣封皆今河南境也鄒去滕近千里今山東境也 諸侯之禮吾未之學也此其分之殊者也雖然吾嘗聞之矣三年之喪齊疏之服飭粥之食自天子達於庶人此其理之一者也分之殊者節文度數之詳固非今日所可考理之一者乃其大本大經之所在出於天理人心之不容已者則固無庸致疑於服行也此孟子之學所以為識其大者而能因畧

以致詳推舊以為新者也

然友反命

云

第二三四五六條出之鄒題下第七條出定公題下

定為三年之喪則所謂齊䟽之服飭粥之食在其中矣
三年之喪非獨世子為然其父兄百官皆有此服故皆不欲也
按孟子下文曰百官有司莫敢不哀先之也曰先之則父兄百官皆有三年之喪可知
喪大記曰喪父三年喪君三年示民不疑也䟽曰
君無骨肉之親若不為重服民則疑君不尊又曰

天子之與后猶父之與母也故為天王服斬衰服父之義也為后服齊服母之義也 且以道去君而未絕者猶服齊衰三月則知古禮臣為君服三年無疑 且志曰喪祭從先祖曰吾有所受之也 朱子大註曰然志所言本謂先王之世舊俗所傳禮文小異而可以通行者耳不謂後世失禮之甚也 志之言

未有所考愚意喪祭從先祖是從先進之意當時父兄亦徒得其言而不得其所以言耳蓋正元初先祖

所當受者不受而反以季世上手祖宗變古之法為
所當受也只看先君莫之行可見矣如宋人議廢立
后曰祖宗有故事類耳但於大註背不敢妄自是區
區愚意聊說以俟後日如何看破耳

吾他日未嘗學問

此問世子是何意慮蓋以其阻於父兄百官之不欲
而莫知所處也既不得遂行孟子之教又不敢輕從
父兄百官之議却是一團不決之意此時之情視向

日初問時之情頗有危機矣孟子告之云惟在世子
之自盡彼之不欲者姑置之盖知人子秉彝之心自
有同然之理在世子既有以先之彼必終於感悟而
無異詞也此聖賢之正術也所謂以身教者從故曰
不可以他求者也又曰是誠在世子與上章世子疑
吾言乎夫道一而已矣同一機軸 孔子曰君薨直
至草上之風必偃皆是孔子之言惟是在世子一句
是孟子言故註曰孟子言但在世子自盡其哀而已

獨露出孟子二字見上云云皆孔子也

即位而哭 位喪位也

世子曰然是誠在我

是誠在我一句最好居今之世而欲行古之道變今之俗如此而已矣是認得孟子是在世子一句話君子不以成敗論人世子亦偉人哉

五月居廬

減十五字

諸侯五月而葬註左傳隱公元年天子七月而葬同

軌畢至諸侯五月同盟至大夫三月同位至士踰月
外姻至此言赴弔各以遠近為差因為葬節 未葬
居倚廬於中門之外註禮記喪大記父母之喪居倚
廬不塗寢苦枕塊非喪事不言也 疏曰倚廬者於
中門外東墻下倚木為廬也不塗者但以草夾障不
以泥塗飾之也

四方來觀之

禮諸侯五月而葬同盟至則四方來者必有隣邦使

金匱要略卷十一
者在內也

弔者大悅

愚以為是四方來弔者也父兄百官不與存焉觀
世子問喪禮一章可以見古道之可復於今再無庸
疑矣

滕文公問為國

蓋自民事不可緩也直至雖周亦助也皆只是說為
國者當先制民恒產之意設為庠序學校以教之一

條方是教民之事所謂然後驅而之善也 孟子曰

民事不可緩也言君當以民事為急也亟其乘屋其
始播百穀民自以農事為急也惟民所急在此故君
當以為急也 晝爾于茅宵爾索綯乃冬月事也故
云來春將復始播百穀而不暇為此 宵爾索綯謂
索是絞也註綯絞也

民之為道也

減九十三字

無恒產而放僻邪侈以陷乎罪者仰不足事俯不足

有救死不贍而不暇治禮義也 放始違於道僻則

浸淫矣邪則成其惡矣侈則益肆矣亦有淺深之別

賢君必恭儉禮下取於民有制

芟二條減五十八字

賢君必恭儉正與罔民者反也取民有制便是仁

上言仁人之急於制民產只是儉德下復兼恭儉言

者蓋恭與儉皆賢君事也恭者必儉儉者必恭且分

田制祿二者相須制祿即禮下之事分田即制民產

之事故於此兼言之 恭儉以持身言禮下取民有

制以其所施者言故曰恭則能以禮接下不可以為指恭儉之實也看則能二字

陽虎曰為富不仁矣

芟三條

不制民恒產而罔民則是厲民自養矣非為富不仁乎

夏后氏五十而貢

芟六條一圖減三十字

註云此以下乃言制民常產與其取之之制也要之制民常產中自有取之之制而乃兼言者何也蓋制

卷十一
民恒產以私田言也取之之制以公田言也夏時五十畝無公田則計其五畝之入者為取之之制也

夏后氏五十畝人七十周人百畝制常產也而貢而助而徹則其取之之制也若單言貢助徹則該制常產之義矣 鄉遂用貢法註見於周禮遂人曰凡治野夫間有遂遂上有徑十夫有溝溝上有畛百夫有洫洫上有涂千夫有澮澮上有道萬夫有川川上有路以達於畿 右鄭註以為此鄉遂用溝洫之法也

用之近郊 都鄙用助法註見於考工記匠人曰匠
人為溝洫耜廣五寸二耜為耦一耦之伐廣尺深尺
謂之畝田首陪之廣二尺深二尺謂之遂九夫為井
井間廣四尺深四尺謂之溝方十里為成成間廣八
尺深八尺謂之洫方百里為同同間廣二尋深二仞
謂之澮專達於川 右鄭註以為此都鄙用井田之
法也用之野外縣都 文獻通考曰按自孟子有野
九一而助國中什一使自賦之說其後鄭康成註周

禮以為周家之制鄉遂用貢法遂人所謂十夫有溝是也都鄙用助法匠人所謂九夫為井是也自是兩法晦菴以為遂人以十為數匠人以九為數決不可合以鄭氏分註作兩項為是而近世諸儒合為一法為非然愚嘗考之孟子所謂野九一者乃受田之制國中什一者乃取民之制蓋助有公田故其數必拘於九八居四旁為私而一居其中為公是為九夫多與少皆不可行若貢則無公田孟子之什一特言其

取之數遂人之十夫特姑舉成數以言之耳若九夫自有九夫之貢法十夫自有十夫之貢法初不必拘以十數而後可行貢法也今徒見匠人有九夫為井之文而謂遂人所謂十夫有溝者亦是以十為數則似太拘蓋自遂而達於溝自溝而達於洫自洫而達于澮自澮而達于川此二法之所以同也行助法之地必須以平地之田分畫作九夫中為公田而八夫之私田環之列如井字整如碁局所謂溝洫者直

欲限田之多少而為之疆界行貢法之地則無問高原下隰截長補短每夫授之百畝所謂溝洫者不過隨地之高下而為之蓄洩此二法之所以異也是以匠人言遂必曰二尺言溝必曰四尺言洫必曰八尺言澮必曰二尋蓋以平原曠野之地畫九夫之田以為井各自其九以至於同其間所謂遂溝洫者狹則不足以蓄水而廣則又至於妨田故必有一定之尺寸不可踰也 若遂人只言夫間有遂十夫有溝

百夫有洫千夫有澮蓋是山谷數澤之間隨地為田
橫斜廣狹皆可墾辟故溝洫亦不言其尺寸所謂夫
間有遂遂上有徑以至萬夫有川川上有路云者姑
約畧言之大意謂路之下即為水溝溝之下即為田
耳非若匠人之田必拘以九夫而其溝洫之必拘以
若干尺也 十夫有溝八家同井註夫與家一般一
夫上有父母下有妻子或九人或五人然謂數口之
家也非夫與家不同也然則何以言十夫也周禮地

官司徒遂人凡治野夫間有遂遂上有徑十夫有溝
溝上有畛故用其文云十夫也

其實皆什一也

減五十四字移一條入上題補正

夏時一夫受田五十畝而計其五畝之入以為貢是
於五十畝之內取其五畝也其為十取其一最為明
白矣 商時井田之制八家私田各七十畝而共助
耕公田七十畝公田內除地十四畝為廬舍見在公
田僅五十六畝八家所助各得七畝七八五十六也

是於七十畝之外取其七畝也為十一分取其一矣
周制鄉遂用貢法十夫有溝十夫各受田百畝也
而各自貢其十畝之入此亦是於十分之內取其一
都鄙用助法八家同井八家共受私田八百畝而
共耕公田百畝公田內除二十畝為廬舍則公田僅
八十畝此亦是於十分之外取其一周時鄉遂之貢
無幾惟井田之制為多 貢法是於十分之中取其
一助徹二法若計廬舍則是於十分外取其一大槩

則同矣故曰其實皆什一也 貢助徹大槩則皆是
十取其一也究其實則助法是十一分取一又輕於
十一矣 徹字當與貢助為一類即是取之之制也
按朱註曰耕則通力而作收則計畝而分此便是徹
義所謂通也均也後人誤謂以其通用貢助之法而
名曰徹則非矣 耕則通力而作收則計畝而分註
此周家之徹兼鄉遂之貢與都鄙之助皆然也其曰
計畝而分者十夫有溝者亦然也若純以都鄙之助

法言則為計區而分而該不得鄉遂之貢矣 中以
二十畝為廬舍註新安陳曰二十畝分為八家家各
二畝半以為治田時所居所謂二畝半在田是也

周制則公田百畝中以二十畝為廬舍一夫所耕公

田實計十畝其以二十畝為廬舍

云

云者乃都鄙用

助法者也不言鄉遂用貢法者十而自賦其一不用
訓解也 通考曰三代貢助徹之法歷千餘年而不
變者盖有封建足以維持井田故也三代而上天下

非天子所得私也秦廢封建而始以天下奉一人矣
三代而上田產非庶人所得私也秦廢井田而始捐
田產以與百姓矣 金履祥曰以今尺步計古之百
畝當今四十一畝古之二畝半當今之一畝十步愚
謂以故一夫能耕百畝也又北方不純是水田多只
一季收不多費力也 朱子曰嘗疑孟子所謂夏后
氏五十而貢殷人七十而助周人百畝而徹恐不解
如此先王疆理天下之初做許多畝澮溝洫之類大

段是費人力了若是自五十而增為七十自七十而增為百畝則田間許多疆理孟子當時未必親見只是傳聞如此恐亦難盡信也

龍子曰治地莫善於助莫不善於貢

夏后氏五十而貢一條備舉先王取民以制之法也
龍子曰治地莫善於助一條則從而裁其所宜行於
今者校數歲之中猶云約數歲之中以為常年年
令如此貢於上也校數歲之中謂樂歲與凶歲二者

之中也蓋數歲之內自有凶樂之不同此亦近於子
莫之執中矣然按周制鄉遂用貢法亦有司稼之官
巡野觀稼視年之上下以出歛法則其弊未至如龍
子之言乃當時諸侯用貢法之弊耳司稼之說出大
全註

樂歲粒米狼戾多取之云

云

狼戾猶狼籍註韻府曰言粒米饒多狼籍棄捐於地
也戾字亦有顛亂之意

凶年糞其田而不足 芟四條

謂以所得者供墾田之費尚不能給也糞田亦必資
米穀以為餉也 自此以下亦且做龍子之言看為
大註不曾曰自某以下申龍子之言也 孟子引龍
子之言所以明助法之善而不可不行耳其實龍子
所譏非大禹之元法也自古無法無弊蓋無人則弊
矣 使文王武王周公生於大禹之時亦決只是行
貢法而已蓋是時洪水方平懷山襄陵之患始息上

窟下巢之居始變其民大槩星居散處其田亦大槩
段落不相聯屬若聚其田而經界之聚其民而使之
八家同井通力合作大抵是難及歷四百年而為商
又五百年而為周則天下之田土盡已墾辟天下之
生齒益以繁庶且周監于二代安得不會貢助而為
徹哉故曰時之未至聖人不能先時而有為時之既
至聖人不敢後時而不為龍子之言蓋激於當日之
弊而未及考聖禹之時也

夫世祿滕固行之矣

減六十三字

上方論貢助徹之法而忽著此一句者蓋耕者九一
仕者世祿二者王政之本也故言此以起下文見二
者當並行而不可偏廢即下文無君子莫治野人無
野人莫養君子之意況世祿雖行而助法未舉則所
取於民以供世祿之需者猶未出於王政之本意今
即其所已行而使併舉其所未行則不惟其所未行
者得因以行而其所已行者亦因得以正矣此句特

以起下文孟子之意固有在矣 夫世祿滕固行之
矣此不必是公田所需者蓋當時助法不行即有公
田只是於貢法隨俗加賦而取之正是取民無制者
也 貢法無公田而集註乃曰蓋世祿者受之土田
使之食其公田之入實與助法相為表裏云此蓋
正言之乃承上文耕者九一仕者世祿而云也

詩云雨我公田

朱子曰考之周禮行助法處有公田行貢法處無公田

設為庠序學校以教之 云

或曰庠序學校只是舉三代教民之制如此非使滕文公兼設此四學也若文公當日設學教民只用一鄉學一國學一國學足矣鄉學則不止一所古者國學惟天子之都及諸侯之國都有之鄉學則隨所在而酌立鄉里子弟之秀者以次升之至於國學而待用其不能者則歸之農而士農分矣然設為庠序學校以教之以設為二字提端而夏商周字在下還當

作使文公設學教民云 兼舉庠序學校文公若行
時聽其自擇一名也

庠者養也校者教也序者射也

兼十條

庠者養也或養國老或養庶老所以教民之老老而
長長也 校者教也教民不外乎六德六行六藝之
屬也 序者射也必內志正外體直持弓矢審固然
後可以言中也 庠以養老為義序以習射為義而
所教實兼五品之人倫此皆鄉學三代所教皆同但

取一義以名學 王制有虞氏養國老於上庠養庶
老於下庠夏后氏養國老於東序養庶老於西序殷
人養國老於右學養庶老於左學周人養國老於東
膠養庶老於虞庠虞庠在國之西郊 國老謂卿大
夫致仕者庶老謂士及庶人在官者養國老者為大
學養庶老者為小學 古人立學於養老之義最重
故以天子之尊亦躬行養老之禮 射義曰古者諸
侯之射也必先行燕禮卿大夫士之射也必先行鄉

飲酒之禮燕禮者所以明君臣之義也鄉飲酒之禮者所以明長幼之禮也故射進退周旋必中禮內志正外體直然後持弓矢審固持弓矢審固然後可以言中此可以觀德行矣是故古之天子以射選諸侯卿大夫士射者男子之事也因而飾之以禮樂也故事之盡禮樂而可數為以立德行者莫若射故聖王務焉是故古者天子之制諸侯歲獻貢士於天子試之於射宮其容體比於禮其節比於樂而中多

者得預於祭其容體不比於禮其節不比於樂而中
少者不得與於祭數與於祭而君有慶數不與於祭
而君有讓數有慶而益地數有讓而削地故曰射者
射為諸侯也是以諸侯君臣盡志於射以習禮樂夫
君臣習禮樂而以流亡者未之有也 夫諸侯之學
小學在內大學在外故王制言小學在公宮南之左
大學在郊以其選士由內以升於外然後達於京故
也天子之學小學居外大學居內故文王世子言凡

語于郊然後於成均取爵於上尊以其選士由外以升于內然後達於朝故也

人倫明於上

人倫明於上則小民各服其教而自相親於下矣相親於下者如所教之人倫父子親君臣義夫婦別長幼序而朋友信也

小民親於下

當如饒氏說君與臣自相親父與子自相親長與幼

自相親非尊君親上之親此說可從蓋合帝命契所謂百姓不親五品不遜之義然後自該得親上之義矣

有王者起必來取法

芟一條

言以上所言養民教民之法皆出於古而宜於今乃百王不易之良法也於今行之雖以國小未能自致王業然王者有作決不能舍是而他有所取矣故曰是為王者師也而滕之勢亦將日以强大如文王之

能新其天命可期也蓋當時國勢大槩弱甚未可責效於旦夕若許齊梁之君者故但云云

子力行之亦以新子之國

芟一條

蓋天下之事有理有勢如齊如梁有其勢者也若行仁政則理勢俱到矣故曰然而不王者未之有也若滕未有其勢者也苟行仁政亦僅有其理而勢不足輔之故止曰是為王者師亦以新子之國而已矣大抵理勢之間學者所當默識孟子他日論天下有道

無道

云

以為皆天也順天者存逆天者亡則聖賢

於世故可謂審矣

夫仁政必自經界始

移一條入下題分為二

此仁政專指分田制祿

經界謂治地分田經畫其

溝塗封植之界也註溝水界也溝洫之類也如曰澮

曰川皆是塗陸界也如曰徑曰畛曰塗曰道曰路皆

是封土垝也植種木也直音曰五里一垝

經界不正井地不均穀祿不平

第二條減三十字

經界不正則田無定分而在下之豪強者得以兼并
故井地不均而野人有失其所者矣賦無定法而在
上之貪暴者得以多取故穀祿不平而君子有失其
所者矣 此士民之所病而暴君污吏之所利也故
曰暴君污吏必慢其經界蓋暴君污吏正所謂豪強
之兼并貪暴之多取者也 惟經界一正則豪強不
得以兼并矣貪暴不得以多取矣分田制祿定矣

夫滕壤地褊小

君子小人不可相無故分田制祿之法不可偏廢

將為君子焉

減二十六字

將殆也言殆必有為君子者焉殆必有為野人者焉此兩樣人皆不可無則分田制祿兩樣法皆不可缺矣孟子所以言分田制祿不可偏廢者蓋當時上之所以自養者或太過而其所以養下者多不及士大夫固自有常祿惟民庶則未有常祿故孟子告以無君子莫治野人無野人莫養君子祿固當制以養

金史四庫全書
卷十一
君子而田尤不可不分以養野人也其詞雖若兩平其意則重在分田上故夫世祿滕固行之矣惟助法未行故取於民者無制且其貢亦不止什一也

請野九一而助

芟二條

野郊外都鄙之地也註平原曠野可畫為萬夫之井故為公田而行助法也國中郊門之內鄉遂之地也註包山林陵麓在內難用井里齊整分畫只絕長補短計之約田百畝則授一夫使自貢其什分之一

於上也 請野九一而助國中什一使自賦總言行
周之徹也 輔氏曰都鄙用助法則收公田所入以
為君子之祿鄉遂用貢法則使什自賦一以充國家
所用此說意周蓋君子之祿即所謂君十卿祿卿祿
四大夫大夫倍上士者皆有畝數決是助法之公田
無疑然國家供費萬端又將於何取給故知貢法所
取者實以給之此外又有布縷力役之征工商衡虞
之人凡皆野人所供也 前只言治地莫善於助至

雖周亦助也切切焉只要滕行助法都不及貢及答戰則云請野九一而助國中什一使自賦却又兼貢何也曰滕當時只是行貢法也世祿已行者正是將貢上之粟充世祿也惟助法未行故始則切切然只言助法後告畢戰不得不兼言貢助蓋授以方畧形勢也然滕雖嘗用貢而貢亦不止什一又不止鄉遂用貢也故又云國中什一使自賦而註云以此推之當時非惟助法不行其貢亦不止什一矣

卿以下必有圭田

夏九條減一百十三字首條裁剪更定次序

註圭潔也所以奉祭祀也據此大註圭潔之義只是專以奉祭故云而趙氏惠註乃曰德行潔白始與之田亦太鑿矣圭田五十畝是卿以下皆同也蓋制祿之法則有定分卿祿四大夫大夫倍上士上士倍中士中士倍下士惟圭田乃是分外加厚之田則一視同仁無卿大夫士之別蓋先王之特恩也卿以下必有圭田圭田五十畝餘夫二十五畝此亦井田

之制也非井田法外之制但是分田制祿常制之外
爾 饒氏曰圭田餘夫亦是百畝中撥與他半分則
五十畝四分則二十五畝問各受田百畝六十歲父
傳與其子子養其父但只是長子受父之田次子便
是餘夫別請二十五畝若無子則百畝納之官曰然
死徙無出鄉

一條減三十五字

此言井田之法之有以善民俗也若只說井田之善
則上下俱見其善不獨民俗矣今觀死徙無出鄉鄉

田同井出入相友守望相助疾病相扶持則百姓親睦都是就百姓說故定為井田之法有以善民俗亦不必云著其效也蓋都是井田之制使然耳若云行井田之法之效則必至願受一廛而為聖人氓處方是聖賢文字多是信筆文章如此節若論到理之密處似當云鄉田同井出入相友守望相助疾病相扶持死徙無出鄉則百姓親睦然聖人固不拘拘而大理自無所失鄉田同井則十夫有溝者不在此耳

金史卷之二十一
方里而井井九百畝

卷十一
二條

大註云此詳言井田形體之制乃周之助法也上言
野及國中二法此獨詳於治野者國中貢法當世已
行但取之過於什一耳王制井田形體之制尤詳

民年二十受田六十歸田

公事畢然後敢治私事所以別野人也

別野人以見其不得同於君子而在所後也故云據
野人而言省文耳

此其大畧也

二條舊合為一

指仁政必自經界始至所以別野人也 此比周禮
亦為畧今動輒以周禮律之蓋孟子不見周禮王制
又漢儒刺六經為之者故讀孟子者只用孟子大意
不必過求強合益紛紜而不相入矣但其所以異處
亦當考而知之庶幾其於古法默有權度而得師其
意以見諸用耳

若夫潤澤之則在君與子矣

廿四條減二百十三字

潤柔而不硬也澤滑而不澁也推此義可見但凡論古制後面都着用此意合殺 饒氏曰前面記底是箇硬局子到這裏須要會變通 又曰潤澤非文飾之謂乃是和軟底意思饒氏此說最精故朱註曰潤澤謂因時制宜使合於人情宜於土俗 云云 以此見上文所言只是硬局子也 饒氏曰井田可行於中原平曠之地若是地勢高低如何可井恐江南是用貢法阡陌是田間路古人車制一車濶六尺有餘兩

傍又翼之以人占田太多商君欲富國所以鑿開阡陌為田前此諸侯欲富其國井田大綱已自壞了商君則索性壞却 荀悅論曰古者什一而稅今漢氏或百一而稅然豪強輸其賦大半官家之惠優於三代豪強之暴酷於一秦文帝不正其本適以資豪強也且井田之制不宜於衆人之時卒而革之盖有怨心則生紛亂若高祖初定天下光武中興之後人民稀少立之易矣今既難行宜以口數占田為之立限人

得耕種不得買賣以贍貧弱以防無并且為制度張
本不亦善乎 蘓老泉曰議者皆言奪富民之田此
必生亂如乘大亂之後土曠而人稀可一舉而就吾
又以為不然今雖使富民奉其田而歸諸公以為井
田其勢亦不可得何則井田之制 云 萬夫之地蓋
三十二里有半而其間為川為路者一為澮為道者
九為洫為塗者百為溝為畛者千為遂為徑者萬此
二者非塞溪壑平澗谷夷丘陵破墳墓壞廬舍徙城

郭易疆隴不可為也縱使盡得平原曠野而遂規畫於其中亦當驅天下之人竭天下之糧窮數百年盡力於此不治他事而後可以望天下之地盡為井田盡為溝洫已而又為民作屋廬於其中以安其居而後可吁亦迂矣井田成而民之死其骨已朽矣又曰孔光何武曰吏民名田毋過三十頃期盡三年而犯者沒入官是又逼蹙平民使自壞其業非人情難用吾欲少為之限而不奪其田之已過吾限者但使

夫後之人不敢多占田以過吾限耳要之數世富者之子孫或不能保其地以復于貧而彼嘗以過吾限者散而入於他人矣或者子孫出而分之以無幾矣如此則富民所占者少而餘地多貧民易取以為業不為人所役屬各食其地之全利全利不分於人而樂輸官大端望於朝廷下令於天下不驚民不動衆不用井田之制而獲井田之利雖周之井田何以遠過於此命世亞聖之才註命者名也言賢人有

名於世也 命之訓名猶今之人題書名亦云命之
曰何書者名之義也 此二字不見經傳三國史橋
玄謂曹操曰天下將亂非命世之才不能濟也能安
之者惟在君乎命世二字蓋出於此

有為神農之言

芟一條減十五字

有為神農之言者許行着一為字便見其言本非神
農之言矣為其言之為字彷彿似云為其學者之類
遠方之人聞君行仁政

夫仁政必自經界始何為仁政按上文經界既正分田制祿可坐而定也則以分田制祿為仁政亦可

願受一廛而為氓

按集註廛民所居也氓野人之稱則此廛固非市宅矣野人元不在市宅在市宅者商賈也願受一廛而為氓則有田可知陳相兄弟則負耒耜之滕曰願為聖人氓周禮地官遂人上地夫一廛田百畝菜五十畝

皆衣褐捆屨織席以為食

減二十三字

衣褐二字為讀其所以衣者也捆屨織席以為食為一項其所以食者也

曰聞君行聖人之政是亦聖人也願為聖人氓

減十字

此言蓋非面對滕君也上文則言踵門而告文公曰

方是面對之詞許行自楚來既捆屨織席以為食

陳相自宋來又負耒耜只是其未相見之前已有默

相見之機矣故陳相見許行而大悅盡棄其學而學

焉

雖然未聞道也

芟二條

蓋謂神農之道也

賢者與民並耕而食糲飧而治

云

不知是何道理成何世界每一覽輒令人一笑

陳相許行之言所刺在滕君而其所以刺則在孟子也陳相見孟子而道其言蓋將有所軒輊予奪於其間也許行之學亦將思以易天下者然真所謂邪說也

許子必種粟而後食乎

減七十七字第二條插入七字

許子必種粟而後食乎曰然此決知其然者以起下句之難猶將問以刃與政而先問以挺與刃將問與少樂樂與衆樂樂而先問獨樂樂與人樂樂也孟子於折辯之際多用此法曰否許子衣褐陳相本以衣褐逃孟子之駁也然要亦逃不得豈貼身皆是褐乎孟子姑置之續以許子冠乎曰冠又曰奚冠恐其如衣褐之說彼則曰冠素冠素乃布為之者也即曰

自織之與至此則陳相無逃處矣曰否以粟易之則
已自為孟子闢之之地矣又曰害於耕則盡之矣

然孟子方且欲多其邪遁之辭以為折服開悟之地
故不即闢之而又曰許子以釜甑爨以鐵耕乎彼則
又曰然又曰以粟易之然後曰以粟易械器者不為

厲陶冶

云

人但見孟子之多其詞說而不知此法

即省了許多詞說也不然彼之邪說蔽固已深其執
拘論辯可遽伸吾說耶以朱子之正學精義而不能

折服象山氏兄弟於一時之語次意亦其雄辯之不如孟子也 許子必種粟而後食乎此一段意總謂莫道是為人君者難以與民並耕而食饗殮而治便是他這一匹夫之身已不能盡兼他技況人君一身百職攸萃乎故每詰之云云而果不待辨而自支離矣許子以釜甌爨以鐵耕乎云云

此條出上題本題下減五十一字

上文因論冠彼曰以粟易之則詰之曰許子奚為不自織至論釜甌爨鐵耕彼又曰以粟易之則不復曰

許子奚不自為之蓋以其理之同也即此就是語言之長才文章之妙法

以粟易械器者不為厲陶冶云云可耕且為與

此厲因他厲民自養而發言汝謂滕有倉廩府庫為厲民自養以今觀之以粟易械器者不為厲陶冶陶冶亦以其械器易粟者豈為厲農夫哉知陶冶與農之相易為不相厲則滕君之不並耕而食饗殮而治亦未為厲民以自養也可知此已足以折陳相之說

無餘矣然猶未也又繼之曰且許子何不自為陶冶則凡百器械止皆自取於其家而用於其家是多少便而乃何為紛紛然與百工交易何許子之不憚煩曰百工之事固不可耕且為也即應之曰然則治天下獨可耕且為與蓋上既承其害於耕之說而明彼此之不相屬以見滕君之非厲民以自養矣此則又承其百工不可耕且為之說而明彼此之交相濟亦以見滕君之不厲民以自養也只是一意錯出於語

次之間不必強分為二意抑通章是此意也 械器
釜甑之屬註謂其機械便當也凡民生日用所資器
皿皆是故用之屬二字以該之下文亦兼百工言之
就本文而言則甑爨耒耜皆是也但不可分貼惟陶
冶則分朱註曰陶為甑者冶為釜鐵者陶何以能
為甑曰古之甑實陶為之故從瓦北方原無杉木可
為木甑今有之者皆自南方往也 舍去聲朱註止也
有大人之事有小人之事

天地間大綱有兩樣人亦大綱有兩樣事大人自有
大人之事小人自有小人之事

且一人之身而百工之所為備

云云

此即因陳相所謂百工不可耕且為之說而敷暢言
之也所謂因其所明通其所蔽也

故曰或勞心或勞力

云云

此四句皆古語而孟子引之也註恐人只以或勞心
或勞力二句按故曰二字為古語而以下四句為申

釋之詞故因解治於人等句之義而承之曰此四句
皆古語而孟子引之也

當堯之時天下猶未平洪水橫流

芟一條減一百九十三字

當堯之時天下猶未平此以下言自古聖君賢臣歷
歷可數那有一箇是與民並耕而食饕餮而治者耶
洪水橫流氾濫於中國草木暢茂禽獸繁殖蓋惟
洪水氾濫草木得水則暢茂矣禽獸得草木則繁殖
矣禽獸草木皆妨害五穀者故五穀不登則人類益

稀而禽獸逼人舉中國多是禽獸之地此其上下文相屬之大意也 洪水橫流 云使於是而遽施治水之功則草木之暢茂者道塗既為之梗塞而不通而禽獸之逼人者又方巢穴於其中而不可避治水之功固未可施舜灼見其理勢乃先使益烈山澤而焚之草木既焚禽獸失其所依乃皆逃匿遠去然後禹得以施功於水土 益烈山澤而焚之烈熾其火也焚之者灰之也

禹疏九河淪濟漯而注諸海決汝漢排淮泗而注之江
離騷九歌河伯篇云與汝遊兮九河其註曰河為四
瀆長九河徒駭太史馬頰覆釜胡蘓簡潔鈎盤鬲津
也禹治河至兗州分為九道以殺其溢其間相去二
百餘里徒駭最北鬲津最南蓋徒駭是河之本道東
出分為八枝也 集註曰據禹貢及今水路惟漢水
入江耳汝泗則入淮而淮自入海此謂四水皆入於
江記者之誤也仁山金氏曰當時疏九河淪濟漯排

淮江而注之海決汝泗而注之淮決漢而注之江

書傳漯河之枝流也 漢武帝時九河已堙矣 禮

曰四瀆視諸侯謂之瀆者獨也以其獨入於海故江
河淮濟皆名以瀆焉今以一淮而受大黃河之全蓋
合二瀆而為一也自宋以前河自入海尚能為並河
州郡之害況今河淮合一而清口又合沁泗沂三水
以同歸於淮也哉 當堯之時一段雖末云三過其
門而不入雖欲耕得乎是禹其實憂水土之未平而

不暇耕者堯舜亦在焉蓋舜是承堯之憂禹益又是承舜之憂數聖皆是急於民病而不暇者但三過不入之不暇耕意尤顯然可以曉折人耳故末特言之下節稷之教民稼穡與命契教民言其憂民如此而暇耕乎亦是此意故下云堯以不得舜為已憂舜以不得禹皋陶為已憂獨舉堯舜可見憂責猶在堯舜蓋當時代天救生民者堯也贊堯代天救生民者舜也故下文獨舉堯舜而畧禹益稷契

后稷教民稼穡

夏一條內借六字換放勳上是字減五十四字

水土方平稷便教民粒食以免其艱食之患急於民之事如此是亦自有不暇耕意在民纔得粒食堯舜又慮其無教而入於禽獸之歸又便急急使契為司徒教民人倫堯又且叮嚀告戒之曰勞來匡直輔翼云聖人之憂民如此而暇耕乎此聖人指堯與舜契舜臣名使契為司徒舜舉而使之但天無二日民無二王制誥拜除還須自堯出此古今所以同也

故云放勳曰亦可謂得其事之實矣

堯以不得舜為已憂

云 堯一條

上二條言聖人憂民之事備矣此則承言聖人之憂民如此固非事事而憂之也惟先務其大者耳所謂所以憂民者其大如此不必另說一意

堯以不得舜為已憂

云 得人者謂之仁

減四十八字

夫以不得人為已憂其功利之及人者大矣故曰分人以財謂之惠教人以善謂之忠為天下得人謂之仁

以天下與人易為天下得人難

芟三條

是故以天下與人易為天下得人難此句與上文為天下得人者謂之仁何所闕曰是故二字可味也蓋上文謂為天下得人者謂之仁言得人之功大也故下為天下得人之難以見其功之所以為大也而必以天下與人易對言之此猶中庸言天下國家可均也至中庸不可能也論語謂三軍可奪帥也匹夫不可奪志也之例

大哉堯之為君也

條減七十一字

此條引孔子曰

云

者總是說堯舜之德業巍巍如

許雖有所用心亦斷不至於耕亦不用於耕謂其

心不至用於耕也看於字唯堯則之則法也法字

與論語解齊準義亦同蓋法天則亦與天同其大矣

吾聞用夏變夷者

此條言陳良非可倍者而倍之為乖方也又按陳

良北學中國亦是用夏變夷者也陳相始從陳良而

改從許行亦變於夷者也

昔者孔子沒三年之外

此條意有三段三子皆不倍師而以其尤難者在後
入揖於子貢相向而哭皆失聲然後歸 厚於師也

子貢反築室於場獨居三年然後歸 尤厚於師也

他日子夏子張子游以有若云皜皜乎不可尚已

不肯以其事夫子者改事有若其視陳相以其所事

陳良者而改事於其道相反之許行者何如尤見魯

子之然尊信其師而不惑於衆人之見也 江漢以濯之秋陽以暴之分明是謂道德光輝明著潔白譬如江漢之所濯秋陽之所暴皜皜乎無以加已有若安能擬其彷彿有若既不足以彷彿夫子而乃事以事夫子之禮不惟尊信有若為過高以夫子為有若所可同其待夫子反卑矣而可乎有若之道德本不足以及彷彿夫子特言其言行氣象有類焉而諸子至欲以所事夫子者事之何與雖然有若之言行氣象

猶有類於夫子者而諸子之移所事夫子者事之亦
未有倍師之志也但擬人非其倫為有負於夫子耳
魯子且為之變色厲辭以正之况陳良豪傑之士許
行馭舌恠僻之人相之背此趨彼誠孟子所謂不善
變也 以有若似聖人當時子夏子張子游直以有
若之道德亦似聖人故欲以事孔子者事之集註曰
盖其言行氣象有似之者此乃朱子截斷之辭非可
謂子夏等止以有若之言行氣象有似聖人者也

門人以有若言行氣象類孔子而欲以所事孔子事之有若之所學何也曾子以孔子非有若可繼而止之孔子自生民以來未有之宜非有若之所可繼而非故貶有若也有若雖不足以比孔子而孔門之所以推一時皆無有若比可知咸淳三年升從祀以補十哲衆議必有若也祭酒為書力詆有若不當升而升子張不知論語一書未嘗深許子張據此章則子張欲事有若者也子張之未能為有若昭昭也陸象

山天資高明指心穎悟不欲人從事問學嘗斥有子
孝弟之說為支離奈何習其說者不察因剏攻之於
千載之下耶子張有靈回觀有若恐不自安其位次
耳江漢秋陽之喻曾子蓋盛言夫子道德盛大彰著
灼然非他人可擬之狀而講象山之學者又往往襲
取以證精神之說恐本旨亦不如此在學者詳之

今也南蠻駮舌

云

云異於曾子矣

非先王之道此非字不訓詆毀與論語異端非聖人

之道而別為一端者同 獨言異於曾子者獨舉其
改所事於陳相正相反者言為尤切耳實則此條不
倍師者有三不全是曾子

吾聞出於幽谷至入於幽谷者

移一條入他日子夏題下

此與上節吾聞用夏變夷重一意而疊出所以深責
之也

從許子之道

陳相又言許子之道如此蓋神農始為市井故許子

又託於神農而有是說也

布帛長短同則賈相若

如一尺布五文錢二尺布十文錢通天下布帛一定
如此下倣此看來此說亦一路通但天下通是一樣
則可若布不能無高下則其價亦安得不為之高下
雖戰國之世處士橫議者多然求其悍然全不顧理
勢而倡為此等狂論邪說者計亦惟許行陳相二人
而已

巨屨小屨同賈人豈為之哉

二條舊合為一

此巨小與上文屨小大者不同此巨屨小屨設言當精粗美惡說言巨屨與小屨同賈則人豈肯為其大者哉論物若不論美惡美者與惡者同價則人又豈肯為其美者哉都一向從簡陋易就上去了何能治國家孟子此章折難陳相所稱許行之言還不甚虧他許子必種粟而後食乎一段反難得好痛快分人以財謂之惠一段甚正大此聖賢議論後世絕少

墨者夷之章

夷子思以易天下言其道宗於薄而自用則又獨出於厚何也此便是因其所明而通之

儒者之道古之人至何謂也

喚起之則以為愛無差等施由親始此兩句是夷子自以己意解書之言以釋已厚葬其親之意蓋謂我之愛無差等即儒者之若保赤子者也然愛無差等親與他人一般樣而施必自親始此吾之所以厚葬

吾親正施由親始之說也 墨子以薄為道而夷子獨從厚此正其一點天理之不容泯滅處孟子所以直用以入其教也孟子蓋亦愛其人也夷子是甚樣次第聰明蓋曉得孟子之意欲以兩路擒獲他若伸我之厚者是則與其道之薄者戾矣若伸其道之薄者是則我之獨厚又無謂矣左右皆坑谷也乃為執中之說騎牆之勢曰吾之兼愛與儒者之保赤子何異但謂之如保赤子則所施當自親者始我之獨厚亦

未為倍也蓋兩揅之詞也 既曰愛無差等並不論
親疎矣而又曰施由親始則又畧有親疎之辨此其
言亦自矛盾足見其遁也然下句自有是處夷之所
以未盡滅其本心孟子之所以得以入其教者正惟
有此一綫在故孟子不攻其說之矛盾處而但力攻
其本病之所在也二本之說尤極正大而精至 夷
子意謂儒之如保赤子亦即我之兼愛也我之施由
親始亦即儒之立愛自親始也不知儒者如保赤子

之言自有所取義蓋理一之中自不害其分之殊也
墨之施由親始施其無差等之愛而已蓋自決其分
殊之界限而又非其理一之本然也 皆所謂遁詞也

註蓋天下之勢正而順者常重而無待於外邪而逆
者常輕而不得不資於人夷之之厚葬其親便是心
有不安者矣既有所不安於其教而猶未能自振拔
以歸於正故一則援儒而入於墨其援我者其勢之
輕將藉我以為重也一則推墨而附於儒其附儒者

其勢已孤又將藉我以少立也蓋天命無二理天下無二道凡外吾道而別立門戶者其勢將歸於支離也不特墨道為然

夫夷子信以為人之親其兄之子為若親其鄰之赤子乎視兄之子自是過於鄰之子則已之子益可知故只言兄之子

彼有取爾也

見下文爾也二字皆語助辭

赤子匍匐將入井非赤子之罪也

減二十三字

明小民之無知而犯法要亦非小民之罪也乃上之失其道致然也故保民當如保赤子耳豈真以為民與吾子全無差等哉

且天之生物也使之一本而夷子二本故也

芟三條

愛無差等待其親如路人待路人如其親是親其親也路人亦其親也非二本而何抑豈惟二本蓋千萬本也豈人道哉

夫泚也非為人泚

芟五條減八十三字

註言非為他人見之而然也言其泚無所為也此他人字泛指路人在他人則雖有不忍之心此他人字指他人之親不與上文非為他人見之而然者相同上文明是謂非為他人見之發愧而泚也

揜之誠是也則孝子

至有道矣 芟一條

夷子二本一條只破其所謂愛無差等者以其逆夫一本之理也蓋上世嘗有不葬其親者一條則又因

其厚葬之本心而痛言之以深明夫一本之意其所
以開發之者可為中其肯綮矣夷子自有資質宜
其所以悟也

夷子憮然為間曰命之矣

夷子憮然茫然自失蓋於我心有戚戚焉

滕文公章句下

陳代曰不見諸侯宜若小然

芟一條

陳代蓋謂孟子以謀王斷國之大材其致主安民可

指日而期乃固執不見諸侯之一節致使齟齬於世而上下俱不得蒙其功惠以為迂也故諷之如此

陳代曰不見諸侯宜若小然今一見之大則以王小則以霸此只是枉尺直尋道理又引志曰云者明其從來有此說話而諷其為之也天下之事有義

理有利害孟子之不見諸侯主義理者也陳代之言主利害者也然主義理者自兼得利害專主利害者未免乖於義理而終之則利害所計者亦不完此章

自齊景公田以下俱從義理上說至末云枉已者未
有能直人者也則所計者於利害亦盡矣

昔齊景公田招虞人止而往何哉

芟五條

溝壑溝長而小壑深而大壑谷之受水者 朱子曰
不忘二字是活句 愚意不忘是活句言是拚了能
不顧利害不是說定要死於溝壑而喪其元 如不
待其招而往何哉主於義而言也枉尺直尋則主於
利而言也故此下正其所稱枉尺直尋之非蓋枉尺

直尋不宜於出處去就上用也一枉尺則無復直尋之理矣 問虞人是志士乎是勇士乎抑兼得志士勇士乎曰若貶斥而死則為志士矣若被刑而死則為勇士矣虞人奚擇焉且此二句是孔子諷誦以嘆贊虞人之言辭本虛而意則有所屬耳固非確然以為勇士也不必泥不至將殺之句 大註此以上告之以不可往見之意以上二字就末句說去且夫枉尺而直尋者止亦可為與

孟子卷十一

卷十一

大註此以下正其所稱枉尺直尋之非謂汝所引枉尺直尋云云以利言也士君子出處進退可徇利乎且若果惟利是徇則雖枉多伸少而有利亦將不復顧道義而為之邪甚言其不可也本文兩利字俱就出處上說其曰枉尺直尋俱只是借他字意說一有計利之心則雖枉多伸少而有利亦將為之與甚言其不可也註蓋枉尺直尋已是不可枉尋直尺尤不可也然以求利者之心推之夫既枉尺直尋則其

苟得之心必至於枉尋直尺而後已然而甚不可也
故極其末流而闢拒之 如以利則枉尋直尺而利
亦可為與蓋以情則在所必為以義則愈不可為矣
故如此立言 此便見得枉尺直尋之言不是正當
話然猶是做有直尋之利說至末段則又破去了利
字謂決無枉尺而能直尋之理皆是正其所稱枉尺
直尋之非也

昔者趙簡子使王良與嬖奚乘

與嬖奚乘御在王良射在嬖奚

彊而後可

强者王良可者嬖奚也

謂王良

減二百二十字

簡子語之也

吾為之範我馳驅

大註範法度也言吾為之律以我馳驅之正法

云云

為之詭遇

首條湊合減十七字

詭遇獲禽不循馳道也全是不意而取之弋不射宿之意荒矣朱子曰詭遇獲禽與行險僥倖不同詭遇是做人不當做底行險是做人不敢做底

不失其馳舍矢如破

芟一條

兩句要相連說重在下句看大註而字可見且獨曰今壁奚不能也尤可見下句重請辭亦王良之言非孟子記述之言

御者且羞與射者比

芟一條

亦是不肯枉尺而直尋者 愚按御者且羞與射者
比至何也當以連屬上條且子過矣枉已者未有能
直人者也當更提頭自為一條

枉已者未有能直人者也

美一條減二字移一條入上題

枉尺無直尋之理 言汝謂一屈已便可致王霸不
知道不行於已而欲行於人無是理也尚何王霸之
望哉故曰直已守道所以濟時乃知孟子堅執不見
諸侯之義者非固自為貴重也為是故耳 此章之

旨陳代諷孟子以小屈其所守以伸道孟子始引虞
人言不可自失其所守繼引王良言彼且不肯徇利
而自屈其所守如何我為之末言其所守一屈亦決
無能伸之道理揚新安陳氏曰揚雄謂孔子見陽貨
為屈身以伸道龜山謂雄非知孔子者蓋道外無身
身外無道身屈矣而可以伸道吾未之信也當即此
意以論孟子此章 陳代以不見諸侯為小節殊不
知自君子觀之守孰為大守身為大枉已從人失身

莫大焉不可以謂所屈者小也枉已則是枉道枉道決不能行道所關之大如此而可視為小節乎

景春曰公孫衍張儀

章二條俱出以順為正題下首條減十八字

通鑑所謂犀首者即衍也犀首魏官名衍嘗為此官

當時游說士惟秦儀衍最著

丈夫之冠也父命之

移二條入下題

引禮意全在女子之嫁

云

挾帶此一句

以順為正者妾婦之道也

此二句皆是禮言而本註云當貼在此外今觀本註

下箇蓋言二子

云

亦明白是貼在此二句外衍

儀勢焰如此已能使諸侯懼如何又是妾婦順從之道曰正有道理蓋二子初非有甚人民甲兵在手也不過掉三寸之舌假時君之力以鼓其氣焰而已當時諸侯莫不貪得土地所謂求吾所大欲者二子因投其所好從而捫闔張翕之是以有驚動一時人耳目之勢則全在順從上來故註云阿諛苟容竊取權

勢不是阿諛苟容如何能竊取權勢使得諸侯懼懼
是他國諸侯懼也本國諸侯他却著阿諛苟容始得
阿諛苟容註阿依也諛諂也阿諛所以苟容者也

居天下之廣居

一條芟四條減六十一字

此惟孟子能之儀衍所為件件反此蓋居天下之廣
居者必能以天下為度而不忍禍諸侯毒蒼生以就
其一己之私計也立天下之正位者必能以道自
重不肯致身於汙賤之地而盜弄人主之權勢矣

行天下之大道者必能動與義俱而彼捫闔縱橫之事又皆不屑為矣 朱子曰此心廓然無一毫私意直與天地同量這便是居天下之廣居便是居仁到得自家立身更無些子不當於理這便是立天下之正位便是立於禮及推而見於事更無些子不合於義此便是行天下之大道便是由義 廣居曰天下之廣居正位曰天下之正位大道曰天下之大道天下字不閒蓋皆是第一等的直到至極處故語錄說

居廣居則曰無一毫私意直與天地同量說立正位則曰更無些子不當理說行大道則曰更無些子不合義 朱子曰廣居是處心正位是處身大道是處事 與民由之之字指仁禮義 獨行其道道字亦指仁禮義 孟子因景春大丈夫三字上生出此議論可謂的確矣不是學問徹底精微心胸徹底明朗如何有此雄辯

周霄問曰古之君子仕乎

芟三條減三十三字

公明儀曰古之人三月無君則弔所以弔者說見下文
禮曰諸侯耕助至以為衣服又惟士無田則亦
不祭只此四句是禮文在禮是兩段一出記祭義一
出記王制餘皆孟子解禮之文則不敢以晏亦不足
弔乎兩句只帶惟士無田一段蓋主意在答三月無
君則弔其上云犧牲不成粢盛不潔衣服不備不敢
以祭此是諸侯之失國家者說夫人蠶繅而又兼
祀先王先公者諸侯亦助祭於天子之廟故也蠶

本是世婦繭成然後獻夫人繅今云夫人蠶繅者蠶亦夫人主之也且曰使世婦使者誰使之夫人治內事也 夫人副禘受之註云副者王后之首服猶王之冕禘者王后之衣猶王之衮衣二者皆王后之服又曰周禮內司服掌王后六服禘衣其一首服為副副禘皆祭服 愚按謂王后之服只循舊文而不察夫人亦有副禘也如衮冕一般天子有衮冕諸侯亦有衮冕但天子自有天子之衮冕王后自有王后

之副褱制固必有等殺矣此處小註都欠主張 吳氏程曰副編髮為之所以覆首為節褱與翬同刻繒為之形而彩畫之綴於衣 繅三盆手小註不甚明禮記註曰三盆手者置繭於盆中而手三次淹之每淹則以手抓出其緒故曰三盆手也方氏云夫人之繅止於三盆猶天子之耕止於三推 繅繅繭為絲也亦作繅 黍稷曰粢在器曰盛註好自然註解牲殺牲必特殺也註不敢用見成牲肉也故曰牲殺

皿所以覆器者註此器與皿之別

惟士無田則亦不祭

減一百三十八字移三條入上題

士有田則祭無田則薦出王制庶人春薦韭夏薦麥
秋薦黍冬薦稻士不仕則不得公田所入是謂無
田也禮有田者既祭又薦新祭以首時薦以仲月
愚謂祭則必諸品備薦則事簡矣雖無田者亦可
以時貿易

不敢以祭則不敢以晏芟一條減九十字

因不敢祭而遂不敢自安方有焦然抱恨之意乃見其所以可弔耳 饒氏曰三月無君則弔恐為士先有位後失位者言之一年有四時之祭失位三月則是廢一祭故可弔弔其不得祭非弔其不得君也古人重祭祀故如此

晉國亦仕國也

晉國解見前篇魏人之稱晉猶東夷人至今稱中國人為唐人也

媒妁之言

媒引合也。妁酌也。斟酌二氏以成配合也。輔氏曰：周霄亦頗有策士之風，但孟子據道之極，不為其動，且述其義理以告之而已。由前段出疆必載質三月，無君則弔之說，則君子之急於仕也如此。由後段又惡不由其道之說，則君子又有不欲速者在。雖曰不敢以祭，則不敢以晏，而有所不恤也。

彭更問曰：後車數十乘，從者數百人。章

以傳食於諸侯傳張應反與傳車之傳同正韻云驛

遞也又曰遞續祿食也然傳字二項當從後註饒

氏曰當時諸侯尚知尊敬儒者如孔子之適衛孟子之在齊皆有所養亦足以見先王之澤未泯

子不通功易事以羨補不足則農有餘粟女有餘布

言必不容於不通功易事也一通用則有功者得食之矣然有功於器用者子尚食之有功於吾道者子反薄之奈何此孟子推彭更之意也

梓匠輪輿

減五十三字

趙氏惠曰梓人成器械以利用匠人營宮室以安居輪人作車輪以運行輿人作車輿以利載

入則孝出則悌守先王之道以待後之學者

或謂其功只此而已乎曰孟子論道義以仁義二字總括之而論仁之實則曰事親義之實則曰從兄有子亦以孝弟為仁之本此下文即以仁義承之蓋孟子當時無位無他功可言故只云其曰孝弟舉大

端也其曰守先王之道則所該尚多至如論井田學校之制喪禮封建之法何莫非先王之道凡皆以垂後世也

梓匠輪輿其志將以求食也

彭更孟子弟子也而曰梓匠輪輿其志將以求食也君子之為道也其志亦將以求食與似非弟子之言者曰想當時人以此疵議孟子者必多彭更蓋惑之故直言以質之安知其非發於愛師之心邪禮事師

無犯無隱

且子食志乎食功乎曰食志

此則彭更執拘之詞也初問謂士無事而食不可已
是主於食功矣見孟子說出一段有功處彼却逃之
於食志此所以終見破於孟子理道之言也

有人於此毀瓦畫墁

墁牆壁之飾也註如白灰蓋之便是飾之於外若以
細土近白者蓋之亦是飾也畫非畫以來也如以木

石畫成縱橫之文於上皆畫墁也

其志將以求食也則子食之乎

此難似猶可解曰此則喪心病狂之人所不論也凡執藝以求食者必無此矣而何害其為食志然孟子必將應之曰然則子固以其藝而食之矣非食功而何

萬章問曰宋小國也章

要其有酒食黍稻者奪之

要攔截也食便飯也黍稷預為飯者未熟者也食指熟者

紹我周王見休

大註紹繼也猶言事也紹何以為事盖向日事商今則繼事周矣

孟子謂戴不勝曰章

子謂薛居州善士也使之居於王所

味謂字及使之字疑居州是不勝所引拔也味孟

子此意蓋不勝是得宋柄且有心於國者故孟子告
以此欲其旁招犀彥使忠賢畢集庶幾成正君之功
非徒責其薦居州無益也

公孫丑問曰不見諸侯何義

問孟子不見諸侯其見惠王何也曰不見諸侯不先
往也見惠王答其禮也

古者不為臣不見

此句正答不見諸侯之義不可泥揔註而界然分為

三意全不相屬也 曰古者不為臣不見然亦惟何甚迫斯可以見矣如孔子之於陽貨亦何嘗絕之而不見但自有其節不至淪於汙賤必俟其禮之至而後往見之也此是此章數節相承之說

陽貨欲見孔子而惡無禮

此又引孔子之事以明可見之節也 註可見之節四字有味所謂聖人禮義之中正也

當是時陽貨先豈得不見 減一百九十九字裁剪湊合

陽貨於魯為大夫孔子為士註貨本陪臣而執國命
僭以大夫自處耳然能先施則孔子亦往見之乃士
禮也 一說當時陽貨若不瞰其亡而先加禮焉孔
子豈有瞰亡往拜而不見之也邪此說未安蓋當時
陽貨饋孔子蒸豚便是先來加禮了還從舊說為安
所謂聖人禮義之中正也

脅肩諂笑 芟一條

大註脅肩竦體非謂脅為竦肩為體也此是會意解

人竦體則脅肩張矣故曰云 脅腋下也肩在背

之上兩邊脇在下肩在上二者為一體

戴盈之曰什一去關市之征

如知其非義斯速已矣何待來年 芟三條

此直是說請輕之以待來年然後已者不必兼攘雞

者平說觀本註云知義理之不可而不能速改與月

攘一雞者何異此自有賓主 斯速已矣此已字止

也與上下兩箇然後已之已正相應之辭

公都子曰外人皆稱夫子好章

予不得已也

要知其所以不得已處韓子曰如古之無聖人人之類滅久矣知此則知聖賢之所以不得已處

天下之生久矣一治一亂芟二條減二十六字

其亂也常由氣化之衰與人事之失所致而其治也則常由人事之有以挽回乎氣化也 氣化盛衰人事得失反覆相尋註兩平說各自有反覆相尋治亂

所因二者俱有

當堯之時

下者為巢下地卑濕故架木為巢以居 上者為營窟以其地高燥故可穴居 洪水之災非堯所致堯猶曰洚水警予後世乃以天旱為乾封不亦大可笑乎使禹治之 芟一條減四十二字

禹之一治以人事挽回氣化也

堯舜既沒 止天下又大亂 芟三條

由堯舜至於湯亦五百有餘年而湯實伐夏救民是亦反一亂而為一治者孟子何故畧之曰據湯聖德實不在武王下然桀之亂不如紂之甚而湯靖難之功亦止一舉而大事定悉數之不過什一征耳比於禹之治洪水武王周公之誅紂伐奄驅飛廉滅國者五十驅虎豹犀象其勞實數倍也故畧之舉其甚者言蓋亦偶然無意抑之也

周公相武王誅紂伐奄三年討其君

芟一條減四十字

紂則誅矣伐奄至三年之久乃得其君而誅之 引
書以明一治之功如此其盛也 輔氏曰正可為也
無缺為難無缺謂禮樂刑政四達而不悖三千三百
之儀與至誠無息之道並立而不偏所以正德利用
厚生之具無一之不備防偽禁邪正慝之法無一之
或隳夫然後可以無缺

世衰道微止有之 芟一條移一條入下題

輔氏曰前乎此者雖曰世亂然但有以戕民之生未

至於賊民之性至此以後則遂至傷壞人倫將使人
盡為禽獸之歸其禍又慘矣

邪說暴行有作

本題舊在周公題前爻二條減六十七字首條出上題

有作之有字與又義通用

上文

云

云全指在上人

為亂首者此句通上下而言不止謂上文云也如

此說又字方有歸着不然又字無安頓了饒氏曰暴

行通上下而言必有邪說糊塗了箇義理然後暴行

始作誠哉是言自古及今大抵皆然有暴行必有邪

說以文之

孔子懼作春秋

芟四條減七十二字

要看是故二字下兩句都要粘著天子之事一句說
朱子說一治只云致治之法垂於萬世而不及亂
賊懼何也亂臣賊子豈謂當時亂臣賊子邪是自有
春秋之後底亂臣賊子懼也豈非致治之法垂于後
世也邪蓋是誅其既死者以警其將來者傳曰誅死
者於前所以懼生者於後也

聖王不作

條芟三條減三十三字

問墨氏兼愛何遽至於無父曰人也只孝得一箇父母那裡愛得許多他既欲兼愛則愛父母必踈其孝必不周至非無父而何墨子尚儉惡樂所以里號朝歌墨子回車想得是箇淡泊枯槁底人其事父母也可想見墨氏之道主於仁而仁非其仁楊氏之道主於義而義非其義惟孔子之道仁也而未嘗不義仁而義則仁非兼愛矣義也而未嘗不仁義而仁則

義非為我矣此其所以為大中至正之極而可為萬
世皇極之主而楊墨之所執反為吾道之賊此孟子
之所以闢楊墨以闢孔子之道也 問率獸食人亦
深探其弊而極言之非真有此事曰不然即他之道
便能如此楊氏自是箇退步愛身不理會事底人墨
氏兼愛又弄得無隆殺使天下悵悵然必至於大亂
而後已非率獸食人而何如東晉之清談此便是楊
子之學即老莊之道少間百事廢弛遂啓夷狄亂華

其禍豈不慘於洪水猛獸之害又如梁武帝事佛至
於宗社丘墟亦其驗也 輔氏曰聖人之道非不愛
身也然有致身事君之義有殺身成仁之時故不至
於無君非不愛人也然親親而仁民仁民而愛物有
自然之序故不至於無父 始也揚墨蠱壞人心猶
是率獸食人也其終也人人中其毒皆無父無君而
相鬪相刃相戕相賊無復世道人理矣非人將相食
而何

吾為此懼條芟十條補題二句更定次序

邪說者不得作作於其心二作字不同雖皆訓為起
然不得作謂不得復起於世以惑人也既不得作則
所謂害於事害於政者俱免矣又非一治而何作於
其心心惑於為我兼愛之說也 害於事害於政二
處先後不必深為之說若自有深義朱子當先為之
解矣大抵害於其政者亦能害於其事害於其事者
亦能害於其政 聖人復起不易吾言矣補自信其

言之甚者欲其言之信於人故也所謂賢人之言必引而自高不如此則道不尊者豈虛語哉非故為浪誇也

周公蕪夷狄驅猛獸而百姓寧

減一百二十字

按誅紂伐奄滅國五十不曾說有夷狄此夷狄蓋在所伐五十國之內也曰蕪夷狄則紂奄飛廉亦舉之矣如曰東面而征西夷怨南面而征北狄怨言夷狄則近者可知也

無父無君是周公所膺也

此段直是要起下段以楊墨正是無父無君是在所膺者也不連上意

我亦欲正人心息邪說

云云 芟三條減五十三字

正人心息邪說距詖行放淫辭四句亦有序蓋人心不正所以邪說得乘間而入邪說既入行亦隨而詖矣詖行既行於是互相倡和又有一段淫辭成一篇說話文字故

云云

問孟子欲息邪距詖而必以正

人心為先者何也曰此探本之論也以聖道不明而人心不正邪說得以乘間入之也曰然則亦明聖道以正人心而已何必為此紛紛而涉好辯之嫌哉曰邪說不息則人心益以不正聖道益以不明此又其末之不可不理者也故孟子道性善稱堯舜必使天下曉然知仁義之所在者此所以正人心而為息邪距詖之本也排為我斥兼愛必使天下曉然知邪詖之不可由者所以息邪距詖而為正人心之用也蓋

其體用不偏首尾相應如此然後足以撥亂世而反之正此所以雖得其本而不免於多言也然豈其心之所好哉亦畏天命悲人窮不得已而然耳

能言距楊墨者聖人之徒也

芟四條減四字

言此楊墨為害非惟我所力距正要人人同力以距之才是故誘之曰云是要人人與之為敵然後可必勝而永絕其根抵耳此孟子致意之深處然即此言亦可以見當時楊墨入人之深而惑人之衆矣設

無孟子真箇是皆服左社而言侏儻 大註聖人救
世立法之意其切如此此聖人或專指孔子春秋之
法謂孟子特祖其法耳又或兼指孟子闢邪說之法
故下句以攻討並言也恐前說為長春秋之法實孔
子立魯史元無此見故曰其義則丘竊取之 又曰
若以此意推之則不能攻討而又倡為不必攻討之
說者其為邪說之徒亂賊之黨可知矣愚謂此又救
世立法之嚴處聖賢衛道先後一心也

匡章曰陳仲子豈不誠廉士哉

芟一條

匡章意以仲子世祿之家而能如此故難之而贊其
廉孟子則以仲子本世祿之家無用為此苦節故斥
其悖謬而不成其廉也夫廉只是有分辨不苟取耳
而豈用無故避兄離母至三日不食以求延喘息於
井上之殘李哉正所謂廢人倫而全小節者也在三
王之世當屏諸四裔矣 大註廉有分辨不苟取也
即此便見仲子之過於廉而反不得為廉處廉只是

不苟取仲子何乃自苦如此

於齊國之士吾必以仲子為巨擘

欲抑先揚蓋當時決性命之情貪饕於利欲之場而不知止者滔滔皆是仲子焉得不猶在所取邪

雖然仲子惡能廉止可也

減二十四字

言不得成其廉也廉只是不苟取而仲子以苦節為廉能為蚓乎此孟子嗤之之意

夫蚓上食槁壤下飲黃泉

此段承上必蚓而後可說明其未能如蚓之廉也

大註仲子未免居室食粟一句貼在本文下飲黃泉二句內無與下文仲子所居之室句

伯夷之所築

二句 芟一條 第二條出下題

言未知其果合義與否若合義便是伯夷所築不義便是盜跖所築不要泥伯夷盜跖字 伯夷之所築與四句意正謂仲子之食於妻居於於陵視夫居兄之室食兄之祿則其義在此而不義在彼也孟子胸

中實是如此評斷但含意不露下文方畧露此意耳
自仲子齊之世家也以下都是盡發此意也

仲子齊之世家也兄戴蓋祿萬鍾

芟一條移一條入上題

孟子此數語非為仲子叙世家也固有意在所以明
其兄之祿為可食兄之室為可居也而仲子乃以兄
之祿為不義之祿而不食以兄之室為不義之室而
不居故曰是尚為能充其類也乎明其乖方也 蓋
以義言之其兄之祿兄之室乃正所宜食所宜居也

而其妻之食於陵之室豈必能義於此乎故上文云仲子所居之室伯夷之所築與抑亦盜跖之所築與所食之粟伯夷之所樹與抑亦盜跖之所樹與是未可知也是豈游詞慢說哉其所據者正矣

曰是駢駢之肉也

芟三條減三十八字

是其兄譏之之言


以母則不食以妻則食之一條

芟三條

以理評之則食於母猶為義於妻也居於兄之室猶

為義於於陵也故曰是尚為能充其類也乎 類是
何類仲子所操之類也仲子所操之類謂何以母之
食兄之室為不義而不食不居是也妻之食於陵之
室安知其為義於母之食兄之室哉既不能義於母
之食兄之室則是亦不義之類耳故曰是尚為能充
其類也乎若仲子者蚓而後充其操者也明決無此
理也 若仲子者蚓而後充其操者也即是上文充
仲子之操則蚓而後可者之意言據仲子之志則將

求為蚓而實不能為蚓也明其非廉之正也 新安
陳氏曰匡章以父為重故視妻子為輕仲子反視母
兄為輕而於妻則反食孟子矜匡章而非仲子有以
也



四書蒙引卷十一